



Tun thla chhungin Section Inelna buatsaih tum a ni

Branch News

Chanmari West, 3rd November, 2013 : Ni 29.10.2013 (Thawhleh) zan khan Pu R Lalmalsawma (Vanapa Section) inah Chanmari West Branch YMA Executive Meeting neih a ni a, kumtir lama Meeting-in kumin chhunga Branch hmalakana tura a lo ruahman tawh (Action Plan) pakhat, Section hrang hrangte tana Inelna siam chu November thla chhung ngei hian neih nise tiin he meeting hian a rel.

Ni 29.10.2013-zana Branch Executive Meeting hian Branch Action Plan-a lo dah tawh, Section hrang hrangte Inelna buatsaih chu engti anga kalpui tur nge tih ngun takin a ngaihtuah a, Indoor Games hmanga inelna hi buatsaih nise tiin lungrual takin thutlukna an siam a, hmala turin Organizing Committee hetiang hian an din nghal.

Chairman : Pu K Darthantluanga, Vice President
Secretary : Pu Zonunsanga, Executive Member

Member :
Pu PC Lalawmawia (V-sect)
Pu JK Zosangliana (CH-sect)
Pu EVL Hruaitluanga (N-sect)
Tv Lalrinzuala (T-sect)
Tv Israela (K-sect)

Ni 29.10.2013-zana Branch Executive Meeting hian 68th YMA General Conference hman zawh taka Branch hmalakna leh chanvo neihte a thlirlet baw a. Branch aiawha Zaipawl leh Drama tha taka tihhlawhtlin a ni chu lawmawm a tiin, chanvo tihlawhtlingtute zawng zawng chungah Meeting chuan lawmthu a sawi.

Chanmari West Branch YMA-in Conference Agenda atana kan thawh "Central YMA-in Pem Lehkha a hman mekah hian Epic No. ziahlan bakah Epic Photo copy thil tel ni rawh se" tih Conference Rorelin a pawm chu Meeting chuan lawmawm a ti hle bawk.

Conference hman tura kalte lo buaipui a, kal lam leh haw lama thingpui lo lumsaktute leh

chawhlui lo buatsaihsaktute chungah Meeting chuan lawmthu a sawi bawk.

Conference kalna tura sawm thawhkhawm chu ₹ 19450 niin, hmanral chu ₹ 61860 a nih thu Fin.Secy hnen atangin report dawn a ni a, sum chet vel dan hi Meeting chuan lungrual takin an pawm bawk.

Institutional Finance & State Lottery, Director atanga RBI Financial Education Series Comics milem bu 5, YMA Library-a dah tura an rawn pek chu CVTTP Library-a dah nise Meeting chuan a ti.

Ni 13.11.2013 (Nilai) dar 10:30-a Central Co-ordination Committee (CCC) Meeting Tuikhuahtlang YMA Hall-a neih turah Branch aiawha tel turin Pu R Lalhmachhuana, Branch Treasurer chu Meeting-in a ruat.

Central YMA hnuai Legal Sub-Committee Chairman atana Pu K Darthantluanga (Branch Vice President) ruat a ni chu Meeting chuan lawmawm a ti hle a, theih tawpa jawiawm nise a ti bawk. Tin, Central YMA Sub-Comt peng hrang hranga member tur mi pathum ruat tura Central YMA-in a tih angin heng mite hi Meeting chuan a ruat bawk.

- 1) Pu RL Thanhnuna
- 2) Pu VL Thakima
- 3) Pu Lalchhanhima

Veng chhunga Chhiattaw k chhungkua thenkhatte'n YMA hnena lawmthu sawi nana Thilpek

column lehlamah zawm a ni

□ Ni 29.10.2013 Thawhleh zan khan Executive Meeting tum na neih a ni.

□ Tun thla chhung hian Branch huaihawtin section hrang hrangte indoor games hmanga inelna buatsaih tum a ni.

□ Central YMA hnuai Sub-Committee peng hrang hrang member tur kum 2013 - 2014 atan Chanmari West Branch aiawh turin Pu RL Thanhnuna Branch Asst.Secretary, Branch Executive Member Pu Lalchhanhima leh Pu VL.Thakima te ruat an ni.

AWM THAR

PuSapthlengliana te chhung member 2, Lengpui atangin Pu Rokhuma (L) in CH-Sect. ah .

PEM

Zokhumate chhung member 4 Pu K. Lalthakima In N Section atangin Champhaiah.

column lehlamah ami zawmna

an hlan thin dawn chungchang chu meeting chuan ngun takin a ngaihtuah a, hetiang thilpek pek tum awm ang hriat a nih chuan pe lo tura hrih thin nise, pe lo tura inkhap a rem chiah lova hriat a nih avangin Thilpek petu hnena lawmthu sawina lam hawi hi YMA AW-ah tarlan loh nise Meeting chuan a ti bawk. Section-ah an lo pe a nih pawhin Branch-ah hriattir hmasak zel thin nise tih a ni bawk. He thilpek hian Chhiat tawhna lam ni lo, thil danga thilpek chu huamtir loh ni se, Meeting chuan a ti.



TUNKAR CHANGVAWN

Unaute u, mi sual engpawh a tihlai phawkin awm sela, nangni thlarau mite u, "Thlemna ka tawkw ve dah ang e" tia inveng tha chungin chutiang mi chu thuhnairawlh takin tungding leh rawh u. Galatia 6:1

Editorial Board

Editor:	RLalrinnggheta	9862358337
Joint Editor :	Lalchhandama	9862358347
	JLalnangliana	9862399658
News Editor :	Thangkhuma	9862303135
	Lalchhuanmawia	9862580558
	KLalremtluanga	9862119608
Cir.Manager :	Jacob Lalrinsanga	9612319779
Production Manager :		
	RL Thanhnuna	9436152760

Branch Office Bearer

President	C Lalarliana	9436142049
Vice President	K Darthantluanga	9436196071
Secretary	Zairemmawia	9862385654
Asst. Secretary	RL Thanhnuna	9436152760
Treasurer	R. Lalmachhuana	9436151817
Fin.Secretary	Lalrinliana	9862581814
Adviser-te :	Pu F Zosanga	9436142106
	Pu A Biaklawma	9436363169
	Pu Lalrengpuia Sailo	9862075614

Editorial :

Pathian hruaina leh awmpuina zarah Sahmulphah Thla kan lo chuangkai leh ta reng mai. Kumin chhung hian kan Branch YMA chuan hmalakna kawng hrang hrangah a nei hnem viau mai.

Chutih rual chuan, hriat lawk loh, YMA te'n kan ngaih pawimawh ber tur ni baw si, Thihna pawh kan tawk hnem hle mai. Heng YMA hmalakna leh ke penna hrang hrangah te hian engchen chiah nge tha leh zung ka thawh ve tih hi inggaihtuah a tha khawp mai.

Mihring khawsak phung a inang tawh lo hlawm viau a, eng kawngah mah hian pheikhai chu a rual tak tak thei tawh lo tih chu kan hrethiam tlang vek ang. Tlawmngai tura thalai thenkhat te'n hun kan neih tawh loh dante pawh inhrilh nawn ngai loin kan hre deuh vek. Nikhat lek pawh chawl thei tawh lo khawpa eizawna kawnga buaite kan ni ta fur mai.

Hetih mek lai hian kan chung a Thihna lo thleng tur chu tuman kan pumpelth thei baw si lo. Kumin chhunga mite chung a kan tlawmngaihna ang chiaha rulh ve tur hi ni ta ila kan lungawi meuh ang em? Chhuanlam siam mi hi chuan an siam reng mai a, mite thatna hi an fak viau rualin tih ve tumna pawh an nei lem lo. Kan tlin taw theuh kan thawh mai hian kan la inpeizawn thei viau. Mahse, mahni phak taw pawh tih tum lo hi kan thahnem ta lu deuh chu a ni lo maw? Kum a tawp ruai chu a ni tawh na a, rilru i siam thar leh ang u. Mi dangte tana Malsawmna ni turin inbuatsaih thar leh theuh ang u.

Article**Ka Va Ngaisang Che Em!**

(Article kan dawng leh ta lo, Kum hmasa lam ami kan chhuah nawn mai. Chhiartute hriatthiamna ka ngen e.) **Mangheta Ralte**

Mahni in chhung pawh luah lum hman mang lo khawpin, kum pui lingletin, khawtlang tan, in tha leh zung, in thiamna leh finna, theihna zawng zawng sengin, mawng vawm ba ang maiin in che chhuak a, fak a hnekin reltu leh sawiseltu che u chu an la thahnem fu baw si!!! In va han chhuanawmin, in va han awhawm loh si tak em!! I mawhpurhna, i kova tla hi a rit em a ni. I nupui fanaute phei chuan bansan daih turin an nawr hial lo che maw? Mahse....Khawtlang Hmangaihtu, Y.M.A.Hruaitu i ni miau va. I hmaa awm apiang i hmachhawn a ngai tlat.

A ni reng lah taka, veng thler a zauin, YMA hmalakna pawh a lianin tihtur a tam reng a. Mitthi lumen, Khawhar Ina kal, Thlanlah, Hnatlang, Committee..... a tam khawp mai. Chu a chhapah, mahni Kohhrana mi tangkai leh a pawimawh ber ber i la ni baw si. I indaih lo viau reng a. Khawtlang Hmangaihtu, Y.M.A. Hruaitu i nih kha.

Hlawkna tel tur pakhatmah, (sum leh pai zawng phei chuan) awm baw si lo. Hlawk chu sawi loh, mahni ipite atanga i phawrhte a tul chang a la awm baw nen. Mi dangte tan i inpek ralraih te pawh a ngai a. Khawtlang Hmangaihtu, Y.M.A. Hruaitu te tihtur a ni fo si.Chung lama mi khian i thiltih kha a hriatpui che a nia.

“Chuti chu, khaw nge” tiin tan han la sa teh mahla, i hlawh tur chu a ngai reng tho. YMA thiltih nikhuaa i hmel kan hmuh loh a piangin keini member Phunchiara te ho hian kan lo rel ve hman ziah che a. I lo kal pawhin engvakahmah kan la ngai chuang lo zui. “Hruaitu a ni a, a tihtur reng alawm” tih bak chu Chawimawina NOPUI hlan tur che kan la nei miah lo leh nghal.

Khawtlang thatna tur leh hmasawna a nih chuan tiin zan khaw tairek thlengin i meng a, mi kawmkar i hrut a, sual dovin ke i pen baw a, mahni Khumpui chu i ngai ve thei viauin ka ring? Keini member Phunchiara te'n inthiam lohna nei miah lova, zanlai au thawm leh Dar Ri Mawi Lo kan muthilh hnan leh mai theih lai hian nang chu, “Chanmari West Veng mipuite hriat tur...” tih rual rualin i mu zui thei tawh miah lo va. Hruaitu i ni miau va. I awmna section huam chhung a nih ngat phei chuan Eizawna tlansan thak khawpa in i la buai zui. Eizawna lama i thawhpuite mitmeng kawite pawh i hmuh pah changte pawh a awm foin ka ring. Chuvangin. i tuangte pawh i tichhah lui ve fo

mai thei. Hruaitu i ni sia.....

I tihtur, i kova tla ni chiah si lo, i tih ve ngai ziah si, ka huphurpui em em mai che chu, mi in chhung buaina, mi nufa leh pafa, unau kara inhmuthiam lohna thlenga ban phar tura an rawn ko thin che hi a ni. Mahni in chhung ro pawh rel fel hleih theih loh changte pawh a awm ve lai kara mi fate sual zilh lo ngai leh fo baw nen. Theih tawpa Khawtlang tana sual dova, mi fate awm tha duh lo thu tha i hrilh, i rawn haw lam kha kawngsir atangin keini member Phunchiara te ho hian, i hnung lamah kan nuih zui che tih leh zel hi chu ka hrilh tawh lo mai ang che. I rilrute pawh a na lutuk palh ang. “A fapa/fanu pawh....chuti...khati.....” tiin i chanchin chhelai ber ngaihtuah chhuah phet tumin kan rilru kan lo la seng ve leh ta nghal a. Aw...i dinhmun hi a khirh a ni. Khawtlang Hmangaihtu, Y.M.A. Hruaitu i ni miau sia le.

A tawp berah chuan, keini member Phunchiara te ho thusawi leh kan lo teh vena che hi engah mah ngai duh suh, tih hi kan hrilhru teh ang che. A ruk tak chuan, keini member thatche ber berte pawh hian kan ngaisang chein kan zah ru ngawih ngawih che asin. Kan dah san lutuk vang zawk chein kan phut sang che a, kan beiseina che hi a sang ve leh zel zawk a ni. I lakah kan pangchang em mai a, i tel lova, YMA hmalakna a kal tur hi kan ngai ngam lo zawk mai a ni. Theih tawp chhuah la, kal zel rawh. Khawtlang Hmangaihtu, YMA Hruaitu i nih kha. Hei hi i hria ang u. Kan hruaitute hi mi fel leh dik ber berte an ni kher lo vang. Mihring ve tho an nia, tihsual chang nei, chauh chang leh theih loh chang nei ve thin an ni tih hriain, an dik lohna laia sawisel mai lova, thurawn pe tu nih i tum theuh ang u.

Aw, YMA Hruaitu, Khawtlang Hmangaihtu, Ka Va Han Ngaisang Che Em!

Chawngbawla Section

☐ Ni 31.11.13 (Zirtawp) nileng khan Taitesena Section hruaitute nen RG Stadium-ah friendly match khelh a ni, an hlim tlang hle.

☐ An Committee Member Tv R Lalfakzuala chuan friendly match khelhna-ah a ke a tina palh a, a dam leh thuai an duhsak.

☐ Ni 22.11.13 khian Section chuan veng chung huap Beat Contest a buatsaih dawn a, rimawi lama tuite a tam thei ang ber tel turin an in chah.

☐ Pu Lalchhandama Ralte leh New Horizon School-te chuan Beat Contest hi an Sponsor a, an chungah lawmthu an sawi.

☐ Ni 5.12.13 (Thawhleh) zan hian Tv B Lalsawmzualate inah Committee thut tum a ni a. Committee member-te hunawl lo insiam turin an in chah.

☐ Section Wise Indoor Sports neih a ni dawn a, Member te lo in la fit turin an inchah.

Khuangchera Section

☐ Kar leh hun remchangah meeting neih tum a ni a, hruaitute hunawl lo insiam lawk theuh turin an hriattir.

☐ Inluah tur neite, mahni inluah thar turte pem lehkhafelai tak nei chauh inluah tir turin an inhriattir.

☐ Chhungtinte mahni in leh a vel vawngfai theuh turin an inchah a, thenawmte tana hnawksak lo tura tui chhe paihna nei theuh turin an inhriattir.

☐ YMA hmalakna hrang hrangah memberte thahnem ngai leh zual turin an inchah.

☐ Section hruaitu hlun Pu Lalrinliana te nupa phai lama in check up chu dam tak lo haw leh turin an beisei.

☐ Chanmari West Volleyball Team-te Aizawl North-III MLA Constituency Volleyball Tournament-a Hunthar veng hneha an Champion chu an lawmpui hle.

Neuva Section

☐ An Leader nupui Pi Lalrampari, a hnathawhna lama a kai sang chu an lawmpui hle.

☐ Ni 26.10.2013 zan khan Sap Zu Um 10 leh a chanve man a ni.

☐ Section huam chhungah Zu leh Drug (Ruih chi) zuar an awm a man an nih chuan an chungah engpawh lo thleng se an sawisel thei lovang.

☐ Pu Lalbiakzuala'n Khuang vuakna tha tak a pe chu lawmawm an ti hle.

☐ November thla chungah a Section Wise (Indoor Games) neih turah memberte lo in la fit turin an in chah.

☐ Sumtuakna atana siam "Kawngpui Ningkhawng" lehkhahu zawrhsaktu zawng zawng chungah a Committee chuan lawmthu a sawi.

☐ Vengchhungah chhiat tawk an awmin hruaitute leh memberte Lumen, Thlanlah leh khawhar in kal ah te fan la sauh sauh turin an in ngen.

Taitesena Section

☐ Ni 27.10.2013 (Pathianni) khan an hruaitu Pu C Lalrosiama, a pa Pu Kapmawia'n a boralsan avangin hruaituten ralna hun an hmang.

☐ Ni 31.10.2013 (Ninga) khan section hruaitute leh Chawngbawla Section hruaitute intihhlimna hun hlimawm tak Rajiv Gandhi Stadium Mualpuiah an hmang a hlawkthlak an ti hle.

☐ Chhiatni Fund khawn zo tawh ten a rang lama Section Asst. Leader hnenah thelut turin an inchah nawn leh a, tin, la khawn fel lo ten a rang lama khawn fel turin an inngen tak meuh a ni.

☐ Section huam chhungah damlo mahni in lama awmte leh damdawiin lama awmte an dam leh thuai an duhsak tak meuh a ni.

Vanapa Section

☐ Ni 26.10.2013 zan khan Vanapa Runah Section chhungah thalai thenkhatte Legal Awareness chungchang zirpui an ni a, he hunah hian kumpulan hruaitute leh Branch OB ten an hmanpui a, hlawkthlak anti hle.

☐ Ni 5.11.2013 zanah hian rokhawlhna a awm loh chuan Section Committee thut tum a ni.

☐ Pu K. Lalpianga (Taikawnga) damlo damdawiina awm chu dam taka a lo chhuah leh thuai an duhsak hle.

☐ Ni 14.11.2013 (Ninga) hian Lengpuiah Section picnic neih tum a ni a, picnic naa kal tumte chuan ₹ 50 nen Secretary hnenah Ni 8.11.2013 ral hmain hming pek luh tur a ni a, kal turte chu hun tiam ral hma ngeiin inpek tur a ni e.

☐ Pi Lalmalsawmi w/o LR Bawlliana damdawiina awm chu dam taka a lo chhuah leh thuai an duhsak hle.

VOTE TURA SAWMNA

North East Fashion Designer Competition-neih mekah Pathian khawngaihna avangin hun chep tak karah ka zuk tel ve a. Tunah hian selection an neih hnuah 3rd Round thleng ka la tling ve a. 2nd Round tling tur hian in mi khawngaihna a min Vote turin ka rawn dil e. Top six (6) chiah kan ni tawh si a, nangnin min Vote tlin chuan ka lawm ngawt ang.

Vote dan tur: Voter Card pakhat hi ₹ 5 a ni a, Mi pakhatin duh zat zat lei a Vote thlak theih a ni. Heng dawrah te hian Voter Card te hi lei theih a ni e. 1) Cham cham Store 2) GM Enterprise 3) LR Enterprise 4) Gemini Enterprise

In khawngaihna diltu

Rosey Zohmingliani Zadeng

Ph 8414007051

NGENNA

Kan fanu C Lalbiakzuali (BZ-i) chu *North East Fashion Fusion Dimapur*-a Solo Competition neih mekah Pathian zarah a la tling ve zel a, tunah hian 2nd Round intihsiak turin an inbuatsaih meka, 2nd Round atang hian Voter Card hman tawh tur a nih avangin khawngaih taka min lo vote sak ve turin veng mipuite kan ngen a che u. November ni 16 thleng vote hi thlak theih a ni ang. Heng hmun atangte hian Voter Card hi lei theih a ni ang.

1) Cham Cham Store

2) ROZO Drug Store

In khawngaihna diltu,

C Lalsangzuala te nupa,

Chanmari West, Vanapa Section

MERGE COMPUTER CENTRE

Course Offered

(1) Software Course (2) Hardware Course (3) Video Editing. (4) Tally. (5) Visual Basic

Free Internet Course & Guide book

Gov't Approved & Member

Institution of MCIOA

Opp. RD Office, Chanmari.

Aizawl. Ph. 9862358347 /

9774569327

CWSC FOOTBALL

☐ Ni 4.11.2013 (Thawhtan) zing dar 6:30-ah 3rd Div leh MPL under 17 te High field-ah practice tura kim vek tur a ni e.

☐ Pi Manuni'n football player-te eitur bawngsa tlawm taka a leitir thin bakah 3kg lai mai a pe a, a chungah an lawm hle.

☐ Ni 31.10.2013 zan khan Committee thut a ni.

☐ LS Bakery ten player-te eitur chhang tui tak an hlui sak thin a, an chungah an lawm hle.

CWSC VOLLEYBALL

☐ Inter Village Volleyball tournament lo awm tur atan ngawrh taka inbuatsaih mek a ni.

☐ Aizawl North-III MLA Constituency Volleyball Tournament-ah chhuakin Final-ah Hunthar veng 3 - 1 a hnehin an Champion.

BADMINTON

☐ Tunlain member inkhel an tlem thin a, member-te tan la thar turin an inngen.

☐ Ni 24 - 26.10.2013 chung khan Kanan Open Tournament-ah chhuah ve a ni a, Pu H. Zohmangaiha mens single runner up leh Pu H. Zohmangaiha & Pu Ramnunmawia (Mamawitea) ten mens double-ah runner up lawmman an la chu an lawmpui hle.

VETYDEPT HRIATTIRNA

District AH & Vety Officer thuchhuah zulzuiin Ran hri venna FMD & Vawk pul hri venna (SFV) mass vaccination tih mek a ni a. Kan vengah pawh thawktuten kar thar khian Vawk, Bawng, Kel etc an rawn chiu dawn a, hetiang ran neite chuan lo chiu tir theuh turin kan inngenin kan inhriattir a ni e. FMD jecton ran 1-ah Rs 20, SFV ah Rs 50 a ni e.

CHAWNGZAMLOVA ZOTE

Vety Field Assistant

i/c RAH Centre, Chanmari 'W'

SUB - CENTRE HRIATTIRNA

Nu Naupai tan tir leh naute pianghlim Sub - Centre a la in register lo zawng zawng arang thei ang ber a in report tura hriattir leh ngen in ni e.

HK. ROSANGPUII

Health Worker (F)

Chanmari West Sub-Centre

HLIMI TUI

Tui thianghlim tak 207-in 2000 lts. kan pe thei reng e, a pumpna khawl leh pipe sei kan nei bawk e.

Ph. 9120357528, 9612164673

(4-1)

THIL CHHAR

Ni 26.10.2013 zanah khan Indoor Stadium step-ah pawisa chhar a ni a, a neitu chuan a pawisa zat leh note sawiin Phone No. 0389-2341109-ah zawhfiah theih a ni a, Ni 4.11.2013 ral hma ngeia in rawn lam loh chuan in sawi buai thei lo vang.

PENSIONER HRIATTIRNA

Chanmari West veng chhunga Pensioner awm ten Life Certificate kum tina kan tih thin khatun November, 2013 chung ngei hian tih fel a lo hun leh ta a, mahni hlawh laknaah FORM lain Chairman Local Council/VCP emaw Gazetted Officer emaw sign tir hnuah thehluh leh tur a ni e.

LALTHIANGHLIMA

Secretary

Pensioner Chanmari 'W' Branch

KIDS DEN PRE SCHOOL & DAY CARE, CHALTLANG**ADMISSION NOTICE**

Kids Den Pre-School, Chaltlangah November ni 1, 2013 atangin Session thar tur Admission Form semchhuah tan a ni ang. Fee Structure leh hriattur dang pawimawh chu School Notice Board-ah tarlan a ni e.

Sd/-
Principal

ZOFA

☐ Ni 1.11.2013 (Zirtawp) khan Rallu Lam Film shooting nei turin member 20 te chu Reiek ah an riak lut a, nimin khan tluang takin an lo haw leh ta.

☐ Shooting nei tura member leh a changtu thawk chhuak zawng zawngte chungah lawmthu an sawi. Remchang an neih dan ang zelin film siam hi chhunzawm tum a ni.

ARVY 3D CINEMA

Zodin Square, near Bus Stand RZ Annexe building

5th floor. Film thar hmuhnawm tak tak (2012 - 2013) en tur a awm e.

Showtime 11:30am, 3pm, 7pm

Ticket : Rs 150, Rs 100

Ph. 2325798, 9774310525

(2-1)

HRIATTIRNA

Huan - Lo - Ram mumal taka enkawl tur neite tan thlai inchintir tur tha tak, thar chhuah hralhna lama chiang sa leh a lei let (buy-back) theitu Mizoramah an awm tawh e. Kum thar 2014 atana thlai huan nei tura hmalakpui duhte tan tunah IMCS Ltd. "Farmer's Implementing Services" (Office: Dr R Kapthuama Bldg. 8014551179, Khatla, New Capital peng, Aizawl) ah hian pan emaw biak pawh theih an ni e. (2-2)

MS MEMORIAL OPEN SCHOOL**Admission Notice**

Kum 2013-2014 Session atan October 2014-a exam turin admission hawn a ni ta e. Zirtirtu rintlak leh thiam tak takte enkawl na hnuai ah class regular-a kal thei leh thei lote pawh kan buaipui thei e.

Admission fee : CI X ₹ 1200

CI XII ₹ 1500

Class timing : 6:00 - 8:00am

A hmun : Newfoundland School, Chaltlang, Lily Veng, Sairang road.

Admission form lakna :

Sangtei dawr, Chaltlang dawrkawn

Varte Variety Store, Sairang road

Muantei Tailoring, Ramhlun Industry peng bazar chung Upa Unionthanga dawr, Chaltlang, Lily veng.

Hrechiang duh tan a hnuai phone No. ah hian zawhfiah theih a ni e.

Cont : 9612613315/879424115/
9862210125/9774627484

(2-1)